



UKA2017/71

26/10-2017

Justus Hansen

Inatsisartut aalajagiiffigisassaattut siunnersuut Naalakkersuisut peqquneqassasut Nunatsinni nioqqutissat akiisa OECD-imi inuussutissat naliginnaasumik akiisa agguaqatigiisinnerinut naleqqiullugu nunatsinni qaffasippallaarujussuarnerisa sumik tunngaveqarnersut misissussagaat. Misissuinerup malitsigissariaqassavaa iluarsiiisoqarnissaanut kiisalu ungasinnerusoq eqqarsaatigalugu qanoq akit appartinnissaannut siunnerfimmik aaqqisoqassasoq. Misissuineq UKA 18-imi inatsisartunut saqqummiunneqassasoq innersuussutigineqarluni.

(Inatsisartuni ilaasorta, Per Rosing-Petersen, Partii Naleraq).

(Siullermeerneqarnera)

Inatsisartunut ilaasorta Per Rosing-Petersen ilumoorpoq oqarami nunatsinni nioqqutissat akii qaffasippallaartut. Ajoraluartumik taamaappoq nioqqutissat eqqussukkat namminerlu tunisassiarisagut eqqarsaatigalugit.

Tamatuma kinguneranik amerlaqisut pisariaqartilluinnakkaminnut akissaqartuaannarneq ajorput. Assartuinermi akit nassuiaatissanut ilaapput. Nioqqutissanut nammineq akitsuusiuttakkagut aamma allaavoq nassuiaatissanut ilaasoq.

Tamatuma saniatigut nunarput akissarsiakitsut nunaginngilaat. Tassa imaappoq sulisartut pitsaasunik akissarsiaqartinneqartussaapput nioqqutissat atuisartunut anngukkiartorneranni. Tamatuma aamma aningaasartuutit qaffasissunngortittarpai naggataatigut nioqqutissat ataasiakkaat akisunerussutigilertagaannik.

Siunnersuuteqartup takorloorpaa inuussutissat akii 30-40 procentinik akikinnerulersinneqarsinnaagaluartut ullumimut naleqqiullugu nunuarmi allamut pisiniartartuugutta. Tunngavilersuut Demokraatini upperinngilarput. Unammilleqatigiilluni niuerfinni atuisut akilerumasaat nioqqutissallu akii kusanartumik ataqatigiipput. Tamatuma saniatigu niuertoqanngilaq tunisassiaminnik amingartooruteqarusuttunik. Taamaattoqartuuppat imaaliallannerinnakkut niuertutut ingerlasinnaajunnaassapput.

Taamatulli oqareerluta soqutiginarpoq paasissallugu sooq nioqqutissaatitta akii taamaannersut aamma ilumut iliuuseqarfigninnaanerigut.

Tamanna tunngavigalugu siunnersuut Inuussutissarsiornermut Ataatsimiititaliamut innersuupparput.